



6 Hydref 2021

Annwyl Ddysgwr

GWYBODAETH AM ARHOLIADAU YN 2022

Gobeithio eich bod chi'n mwynhau'r dechrau'r flwyddyn academiaidd newydd, er bod llawer o heriau o hyd, ac mae effaith y pandemig yn dal i effeithio arnoch chi. Rydym am roi gwybod i chi am y cynlluniau sydd ar waith ar gyfer y cymwysterau rydych chi'n eu hastudio ar gyfer eleni.

Haf 2022 - cymwysterau TGAU, UG a Safon Uwch, a'r Dystysgrif Her Sgiliau

Gwnaethom [ysgrifennu](#) atoch chi ym mis Mawrth i ddweud y bydd cymwysterau TGAU, UG a Safon Uwch haf 2022 yn cael eu hasesu drwy arholiadau ac asesiadau di-arholiad, ar gyfer cymwysterau sydd ag asesiadau di-arholiad.

Fel y gwyddoch efallai, mae CBAC wedi gwneud newidiadau i'r cymwysterau ar gyfer haf 2022 yn dilyn ymgynghoriad byr gydag ysgolion, colegau, dysgwyr a rhieni yn gynharach yr haf hwn. Mae gwybodaeth am y newidiadau hyn ar gael ar [wefan](#) CBAC. Mae'r newidiadau hyn ar waith oherwydd yr aflonyddwch i'ch dysgu a achoswyd gan y pandemig (yn y flwyddyn flaenorol ac yn ystod y flwyddyn academiaidd hon). Maen nhw'n wahanol ym mhob cymhwyster a byddant yn eich helpu i ganolbwyntio'ch amser ar baratoi ar gyfer eich arholiadau yr haf nesaf.

Qualifications Wales

Q2 Building, Pencarn Lane
Imperial Park,
Newport
NP10 8AR
☎ 01633 373 222



www.qualificationswales.org

Cymwysterau Cymru

Adeilad Q2, Lôn Pencarn
Parc Imperial,
Casnewydd
NP10 8AR
☎ 01633 373 222

Sut y bydd cymwysterau TGAU, UG a Safon Uwch, a'r Dystysgrif Her Sgiliau yn cael eu graddio yn haf 2022?

Ar ôl i'ch arholiadau a'ch tasgau asesu di-arholiad gael eu marcio, bydd CBAC yn dyfarnu'ch graddau. Rydym eisïau i'r broses raddio fod mor deg â phosibl i bob dysgwr ac adlewyrchu'r aflonyddwch i addysgu a dysgu rydych chi wedi'i brofi yn ystod y ddwy flynedd ddiwethaf ac efallai y byddwch chi'n eu profi eleni.

Ar gyfer haf 2022, bydd y dull gweithredu yng Nghymru yr un fath â rhannau eraill o'r DU fel bod pob dysgwr yn cael ei drin yr un peth. Mae hyn yn golygu y bydd canlyniadau haf 2022 yn adlewyrchu pwynt hanner ffordd yn fras rhwng y canlyniadau yn 2021 a 2019. Yn 2023 byddwn yn anelu at ddychwelyd at ganlyniadau sy'n unol â'r rhai mewn blynyddoedd cyn pandemig.

Teimlwn mai dyma'r cydbwysedd gorau rhwng anghenion dysgwyr sy'n sefyll cymwysterau yn 2022 a thegwch i ddysgwyr a enillodd gymwysterau cyn y pandemig ac a fydd yn sefyll cymwysterau yn y dyfodol. Mae hefyd yn bwysig bod gennych gymwysterau sydd yr un gwerth â'r rhai a gymerir gan ddysgwyr o rannau eraill o'r DU fel y gallwch chi symud ymlaen i goleg, cyflogaeth neu brifysgol.

Beth fydd yn digwydd os na all arholiadau fynd yn eu blaen yn haf 2022?

Disgwyliwn i arholiadau gael eu cynnal fel y cynlluniwyd ac mai dim ond mewn amgylchiadau eithriadol y cânt eu canslo. Ond os bydd y gyfres arholiadau yn cael ei chanslo, yna bydd angen dull wrth gefn (cynllun wrth gefn). Gofynnir i'ch ysgol neu goleg ddyfarnu'ch graddau yn seiliedig ar eich gwaith mewn asesiadau ar draws y cymhwyster. Bydd y broses yn debyg i'r un a ddefnyddiwyd yn haf 2021. Bydd eich ysgol neu goleg yn dweud wrthy'ch pa asesiadau y gallent eu defnyddio. Byddwn yn cyhoeddi canllawiau pellach i'ch ysgol neu goleg ym mis Tachwedd i'w helpu i wneud hyn.

Beth sy'n digwydd gyda chymwysterau galwedigaethol?

Mae newidiadau ar waith ar gyfer asesu cymwysterau galwedigaethol yn 2021/22. Bydd eich ysgol neu goleg yn gwybod pa newidiadau sydd ar waith ar gyfer y cymwysterau rydych chi'n eu hastudio. Os yw eich cymhwyster galwedigaethol yn cael ei asesu trwy arholiad, bydd y rhain yn mynd yn eu blaen fel y cynlluniwyd yn 2021/22. Fel ar gyfer cymwysterau TGAU, UG a Safon Uwch, os bydd y gyfres arholiadau yn cael ei chanslo, bydd trefniadau wrth gefn (cynllun wrth gefn) yn cael eu rhoi ar waith.

Ydy cyfres Gaeaf 2021/22 yn mynd yn ei blaen?

Bydd cyfres Tachwedd 2021 ar gyfer TGAU mewn Saesneg Iaith, Mathemateg, Mathemateg-Rhifedd a Cymraeg Iaith yn digwydd gyda'r un addasiadau.

Bydd yr addasiadau hefyd yn berthnasol i unedau TGAU Llenyddiaeth Saesneg a Llenyddiaeth Gymraeg, ac i gydrannau'r Dystysgrif Her Sgiliau fydd ar gael ym mis Ionawr 2022. Gallwch ddod o hyd i wybodaeth am yr addasiadau hyn ar wefan CBAC – [Addasiadau ar gyfer Cymwysterau CBAC TGAU, UG a Safon Uwch yn 2022 \(cbac.co.uk\)](#).

Negeseuon ar eich cyfer chi

Rydym yn gwybod y gallai fod gennych chi a dysgwyr eraill bryderon ynghylch dychwelyd i arholiadau ac rydym yn cynllunio ystod o gyfathrebu i'ch cefnogi yn ystod y misoedd nesaf. Yn ddiweddar rydym ni wedi diweddarau ein [gwefan](#) i geisio ei gwneud yn haws i chi gael wybodaeth. Byddwn yn anfon gwybodaeth atoch trwy eich ysgol neu goleg yn ystod yr wythnosau nesaf. Bydd gwybodaeth ar gael ar ein gwefan ar gyfer ymgeiswyr preifat. Dilynwch ni ar [Instagram](#), [Twitter](#) neu [Facebook](#) i gael y wybodaeth ddiweddaraf.

Yn gywir



Philip Blaker

Prif Weithredwr